

Pol ndê bapia têtj lau Kolosi-nga

Yom whê bapia dindéc sa-nga

Malac Kolosi yêc gamerj Esia-nga, magoc Pol dau inj gêm mêtê yêc malac Kolosi dom. Têtj ndoc inj gêm mêtê mbo malac Epesas, nañ ngac Kolosi-nga danj ñaê Epapras ngô ma kêñ whiñ, ma tiñambu Epapras mbu gi hoc ñawaê ñayham asê yêc ndê malachu Kolosi (1:7; 4:12), ma lau ñatô sic hu sêkêñ whiñ Yisu. Tiñambu Epapras ndôc gapocwalô whiñ Pol (Pilemon 23), ma gic miñ têtj Pol pi lau sêkêñ whiñ-nga yêc malac Kolosi.

Pol to bapia dindéc ma sôm têtj lau Kolosi-nga bu inj gêm danje Anötö tu ñac si sêkêñ whiñ-nga, ma inj tôc lêtj ñayham daêsam têtj lau sêkêñ whiñ-nga tu sêtj kuc-nga. Ma inj to yom ñatô bu whê lau Kolosi si gauc sa pi yom ñandô. Ñahu bu lau ñatô sêtj sôn ñac pi lau nom-nga si lêtj ñatô (2:4, 8, 16-23), ma ñac sêtoc Kilisi sa ñapep dom, ma bocdinañ inj tôc asê bu Anötö kêñ gêtj hoñ sêsôc Kilisi ñapu (1:15-20; 2:9-15).

Pol gic hu ndê bapia

1 ¹Aô Pol, nañ gati Yisu Kilisi ndê aposel kêkuc Anötö ndê atac whiñ, lu yac neñ asidôwai Timoti ato bapia dindéc. ²Ato têtj mac asidôwai nañ andôc malac atu Kolosi, mac lau dabuñ nañ akêñ whiñ Kilisi. Mwasinj ti yom malô akêñ Damañ Anötö têtj mac.

Pol teñ mbec tu lau Kolosi-nga

³Tôm bêc hoñ yac atej mbec têtj Anötö, yac neñ Pômdau Yisu Kilisi Damba, ma am danje inj tu mac-nga. ⁴Ñahu bu yac anğô ñawaê bu mac akêñ whiñ Yisu Kilisi ñanga, ma atac whiñ Anötö ndê lau dabuñ hoñ. ⁵Mac nem akêñ whiñ ti atac whiñ ñahu sip mwasinj atu nañ mac akêñ batam ambo, nañ Anötö po sa gwanaj tu mac-nga yêc undambê. Yom pi gêtj dau mac anğô muñ su, têtj ndoc sêhoc yom ñandô ñawaê ñayham-nga asê têtj mac. ⁶Ñawaê ñayham dau têtj mac meñ, ma mac anğô ti anğalê yom ñandô pi Anötö ndê mwasinj atu. Têtj ndoc mac anğô tiwakuc e meñ

tên kwahic dec, naŋ ɲawaê ɲayham dau gêm ɲandô ma tiapa yêc mac nem gameŋ. Ma ɲalên tigeri iŋ gêm ɲandô ma tiapa ma gêm gameŋ naŋ lau Rom-ɲga sem gôliŋ, naŋ ahuc. ⁷ɲawaê dau Epapras kédôhôn têt mac. Iŋ yac neŋ ɲgac atac whiŋ-ɲga naŋ gêm gwelenŋ whiŋ yac, ma ɲgac akiŋ ɲandô naŋ gêm akiŋ Kilisi tu mac-ɲga. ⁸Ma iŋ gic miŋ têt yac pi mac nem lêt atac whiŋ asidôwai-ɲga naŋ ɲalau Dabuŋ kêt têt mac.

⁹Tu dinaŋ-ɲga têt bêc ɲamata-ɲga naŋ yac aŋgô mac nem ɲawaê e meŋ têt kwahic dec, naŋ yac atet mbec tu mac-ɲga ɲapaŋ. Yac andac Anötö bu kêt gauc têt mac e aŋyalé ɲalau Dabuŋ ndê lêt tidôn. Ma ɲalên dinaŋ mac oc aŋyalé lêt naŋ Anötö tac whiŋ bu yac dasa-ɲga, naŋ ɲapep eŋ. ¹⁰Yac atet mbec bu mac asa nem lêt gitêt, bu tôc asê bu mac ati Pômdau ndê lau, ma iŋ oc lic mac nem lêt hoŋ ndic iŋ tandô ɲayham. Yac atet mbec bu mac nem akêt whiŋ oc nem ɲandô ɲayham yêc gwelenŋ hoŋ naŋ mac akôm, ma bu mac nem gauc aŋyalé Anötö-ɲga êŋsôwec tiatu. ¹¹Anötö ndê ɲaclai ti ɲawasi atu kêt ɲaŋga têt mac bu akôm gêt hoŋ, ma ɲawapac bu tap mac sa, dec mac atôm bu alhac ɲaŋga ma ahôc ti atac pa su. Ma ambo ti atac ɲayham, ¹²ma anem daŋge Damaŋ Anötö, naŋ gic dabiŋ mac e atôm bu awêkaiŋ iŋ ndê gameŋ ɲawê-ɲga awhiŋ iŋ ndê lau dabuŋ hoŋ. ¹³Iŋ kêgaho yac su yêc ɲaclai ɲasec-ɲga, ma kêt yac dambo iŋ ndê Atu naŋ iŋ atac whiŋ ɲandô, naŋ ndê gôliŋ ɲapu. ¹⁴Ma Anötö kêmwasiŋ yac, dec gêmlihi yac ti kêgapwêc yac su yêc sakiŋ mêtê sac-ɲga, ma suc yac neŋ sac kwi. Ma datap mwasiŋ atu dau sa yêc iŋ ndê Atu dau.

Kilisi ti ndê gwelenŋ

¹⁵Lau daŋ sêlic Anötö dom, magoc iŋ Atu Kilisi gêm iŋ aŋgô ma tôc iŋ asê têt yac. Iŋ tiŋamata gêt hoŋ naŋ Anötö kêt. ¹⁶Bu gêt undambê-ɲga ti gêt nom-ɲga hoŋ naŋ Anötö kêt, naŋ kêt ɲa Kilisi. Gêt naŋ dalic ɲa tanôn, ma gêt naŋ tôm dom bu dalic ɲa tanôn, gitôm aŋela me ɲalau me gôliŋ ma ɲaclai tidau-tidau, gêt hoŋ dinaŋ Anötö kêt ɲa Kilisi ma kêt tu Kilisi-ɲga. ¹⁷Iŋ tiŋamata gêt hoŋ, ma gêt hoŋ si ɲahu sêmbo-ɲga yêc iŋ. ¹⁸Ma iŋ gêm gôliŋ gôlôwac dabuŋ. Iŋ ti ɲagôlôn, ma gôlôwac dabuŋ sêti iŋ ndê ɲandô. Ma iŋ muŋ gôlôwac dabuŋ bu ti ɲgac ɲamata-ɲga bu tisa akêt lau batê-ɲga. Ma bocdinaŋ gêt daŋ hôc gêlêc iŋ su dom. ¹⁹Bu Anötö gêlic ɲayham bu kêt dau sambuc sip Atuŋgac ɲalôm ma mbo whiŋ iŋ. ²⁰Ma iŋ kêkiŋ Atu dau sip nom meŋ bu hê wamba ɲamalac ma gêt nom-ɲga ti gêt undambê-ɲga hoŋ têt Anötö. Ma kwahic dec ɲamalac sêtôm bu sêmbo Anötö aŋgô-ɲga ti yom malô, tu Atuŋgac ndê dac naŋ kêc siŋ pi a gicso-ɲga.

²¹Muŋ-ɲga, mac ambo ahê têt Anötö. Mac ambo atôm iŋ ndê ɲacyo tu gauc ti mêtê sac-sac naŋ yêc mac-ɲga. ²²Magoc iŋ dau kêmasaŋ lêt bu Kilisi sip nom meŋ ti ɲamalac ma mbac ndu, tu bu hê wamba mac têt

Anötö tiyham. Ma inj tac whiņ bu kên mac alhac inj aņgô-ņga atôm lau dabuņ naņ nem giso ti yom mbasi. ²³Mac bu alhac ti akên whiņ ņaņga ma akên batam Anötö ndê mwasin naņ ņawaê ņayham tôle tên mac, ma ahu sinj dom, dec mac oc atap mwasinj dau sa. ņawaê ņayham dau mac aņgô su, ma sêhoc asê yêc gameņ hoņ naņ yêc lau Rom si gôlinj ņapu, naņ bocdinaņ. Ma aô Pol gati ņgac akiņ ņawaê ņayham dau-ņga.

Pol whê ndê gweleņ ņawaê ņayham-ņga sa

²⁴ ņandê bocke naņ aô gahôc tu wapuc mac nem akên whiņ dôņ-ņga, naņ gahôc ti atac ņayham eņ. Ma aô kayalê bu aô gac waê bu wahôc ņandê ņapaņ, tu gweleņ naņ aô gakôm tu bu wapo Kilisi ndê ņandô, naņ gôlôwac dabuņ sa-ņga. M agoc aô oc wahôc e wandic dabiņ gêņ hoņ naņ Kilisi kêyalin sa bu wahôc. ²⁵Aô gakôm gweleņ gam akiņ gôlôwac dabuņ, kakuc lêņ naņ Anötö dau kêmasaņ dec kêyalin aô sa tu mac-ņga, ma kêkinj aô bu wahoc ņawaê ņayham asê e Anötö ndê yom tiapa yêc gameņ hoņ. ²⁶Tên ņamata-ņga e meņ, yom pi Anötö ndê lêņ nem lau si-ņga, naņ ņahu yêc sinj dau tên lau nom-ņga. Magoc kwahic dec inj tôle asê tiawê tên inj ndê lau dabuņ. ²⁷Inj tac whiņ bu lau dabuņ sêņyalê yom naņ muņ-ņga yêc sinj dau, naņ bocdec bu. Inj bu êmwasiņ mac ļlau gameņ apa-ņga bu atap inj ndê ņawasi atu sa, dec kên Kilisi sip nem ņalôm. Ma gêņ dinaņ ti mac nem ņahu akên batam bu atap inj ndê ņawasi sa-ņga.

²⁸ Yac ahoc Kilisi ndê ņawaê ņayham asê, ma Anötö kên gauc ņayham tên yac bu akên puc ti andôhôn lau sêkên whiņ-ņga hoņ. Ma yac akôm bocdinaņ tu bu andic dabiņ ņac hoņ e akên ņac sêlhac Anötö aņgô-ņga sêtôm lau gwalam akwa sêkên whiņ Kilisi-ņga. ²⁹Ma aô gakôm gweleņ ti gahôc ņandê atu, tu bu wakôm gêņ dau ņandô sa-ņga, ņa Kilisi dau ndê ņaclai naņ gêm gweleņ ņaņga yêc aô neņ ņalôm.

2 ¹Aô gawhê neņ gweleņ sa tên mac, ņahu bu aô atac whiņ bu mac aņyalê bu aô gayêm dauņ su ņandô tu mac-ņga, ma tu lau Laodisia-ņga, ma tu lau sêkên whiņ-ņga hoņ naņ sêlic aô aņônj dom-ņga, naņ bocdinaņ. ²Aô tac whiņ bu mêtê atac whiņ-ņga piņ mac hoņ dôņ, ma puc mac dôņ bu alhac ņaņga. Ma yom pi Anötö ndê lêņ nem lau si-ņga naņ muņ-ņga yêc sinj dau, naņ aô tac whiņ bu mac aņyalê tidônj andô, e kôm mac alhac ti akên whiņ ņaņga eņ. Yom dau hêganônj Kilisi. ³Bu yom ti gauc naņ atu andô ma tôm bu êmwasiņ yac-ņga, naņ Anötö gêm ahuc yêc inj-ņga.

⁴Aô gawhê yom hoņ dinaņ sa tên mac, ņahu bu aô gatec bu lau ņatô sêmbac yom mac ma sêņsau mac. ⁵Bu aô dauņ gambo gawhiņ mac dom, tigeņ yêc aneņ ņalôm aô gauc gêm mac ņapaņ. Ma aô atac ņayham atu, bu kayalê bu mac akên whiņ Kilisi ņaņga, ma asa nem lêņ hoņ ņapep.

Dasa neņ lêņ tiwakuc tu Kilisi-ņga

⁶Mac akôc Yisu Kilisi sa su ti mac nem Pômdau, dec akên inj tiņamata nem lêņ hoņ. ⁷Akôc ņaņga yêc inj tôm a naņ ņawakac gacgeņ sip nom

nalóm gi. Ma in ndê ñaclai po mac nem akêñ whin sa bu alhac ñanga, alhac yom ñandô nan sêndôhôn têt mac, nan ñahô. Ma yom anem ñange Anötö-ña nem mac ahuc tôm bêc hon. ⁸ Ayob ñadôm ñapep bu lau tasan si yom ñambwa-ñambwa êñsôn mac nem gauc ma êñgaho mac su yêc yom ñandô e ati lau gapocwalô-ña lec dom. Ñac si yom dau ñahu kêkuc abunñgaci si lêt ti mêtê nom-ña ñambwa, ma meñ akêñ Kilisi ndê dom.

⁹ Bu Anötö kêt dau sambuc sip Kilisi ñalóm, ma meñ mbo nom gitôm ñamalac. ¹⁰ Kilisi dau in gôlin ti ñaclai hon ñadau. Ma tu mac nem akêñ whin pin mac dôñ am damin in-ña, dec Anötö ndê mwasiñ gêm mac ahuc. ¹¹ Kilisi kôm lau Israel-ña si ñpwac sêsê ñamlic ñatô su-ña ñandô sa pi mac lau nan ati in ndê. Gêt dau hóc asê kêkuc ñamalac si lêt sêsê ñamlic-ña dom, magoc Kilisi dau kôm gweleñ yêc mac nem ñalóm gitôm in sê mac nem mêtê sac ñalóm akwa-ña su ginça. ¹² Busanñu nan mac alin, nan pin mac dôñ am damin Kilisi, tôm sêñsuhon mac awhin in, ma Anötö un mac sa awhin in. Gêt dau ñandô sa tu mac akêñ whin Anötö, nan un Kilisi dau sa akêñ lau batê-ña, nan ndê ñaclai.

¹³ Muñ-ña, mac ambo atôm lau batê tu mac nem sac-ña, ma tu mac asap mêtê ñalóm akwa-ña dôñ ñapan-ña. Tigeñ Anötö suc mac nem sac hon kwi, ma kôm mac ati lau ambo tamli tiyham-ña awhin Kilisi. ¹⁴ Tu yac tanñil Anötö ndê yomsu-ña, dec yac datôm lau nan si bapia töp-ña yêc, ma datôm dom bu dandic töp dau, dec tac waê bu datap matôc sa. Magoc Anötö kóc bapia töp-ña dau su yêc yac, ma gic pi a gicso dau whin Kilisi. ¹⁵ Ma Kilisi ndê mbac ndu pi a gicso dau ti lêt bu Anötö ku Sadañ ti ndê ñalau ma ñaclai sac hon dulu, gitôm ñgac bata sin-ña nan kóc ñacyo si wapa sin-ña hon su, ma wê ñac gitôm lau gapocwalô-ña bu tóc asê tiawê bu ñac si ñaclai pacndê sambuc.

Yom pi ñagôlin nom-ña

¹⁶ Tu dinañ-ña dec lau ñatô bu sêñgôlin yom pi mac tu gêt nan an ti anôm-ña, me tu om nan lau sêlic tôm wake me ayô me yala-ñg a, me tu bêc Sabat-ña, nan anñô ñac si yom dom. ¹⁷ Bu gêt hon dinañ gitôm gêt ñagatu ñambwa nan dalic muñ su, ma tinambu ñandô meñ hóc asê. Ma ñandô dau, nan Kilisi. ¹⁸ Lau ñatô sêñkuc lêt ñalóm akwa-ña ma sêtoc dau sa tu ñac si lêt sem akiñ Kilisi-ña. Ñac sêsôm bu sêpu dau ñandô, ma sem akiñ anela kêkuc gêt ñatô nan sêyêc mbê ma sêlic. Lau kain dinañ b u sêpu mac ma sêsôm bu mac nem a kêt whin in gêt ñandô mbasi-ña, dec akóc ñac si yom sa dom. ¹⁹ Bu lau kain dinañ sêsap Kilisi, nan ti gôlôwac dabun hon si ñagôlin, nan dôñ dom. In tawasê pin yac hon dôñ dapitigeñ, ma gôlôwac d abun kêsôwec ña ñaclai nan Anötö dau kêt.

²⁰ Anñô su nan. Têt ndoc ñamalac d an mbac ndu, nan ñagôlin ti ñaclai nom-ña gêm gôlin in tiyham dom. Ma tu Anötö pin mac dôñ am damin

Kilisi-nga, dec tòm mac ambac ndu awhiņ iņ. Bocdinaņ tu sake-nga mac ambo atòm lau naņ sêhêgo dau pi ñagôliņ nom-nga? ²¹Lau kaiņ dinaņ sic yao gêņ tidau-tidau ma sêsôm bocdec bu, “Akôc dom, aneņ ti anôm dom, ma amasec dom.” ²²Yom kaiņ dinaņ kêkuc gauc ti ñagôliņ naņ lau nom-nga sêndôhôn, ma hêganôn gêņ têm kwahic dec-nga naņ taņ ti danôm ma gêņ dau meņ giņga. ²³Lau naņ sêsôc ñagôliņ kaiņ dinaņ ñapu, naņ sêņkuc gauc ñamalac-nga tu lêņ sênem akiņ Anötö-nga ti sêņgwiniņ dau-nga ma lêņ sêkêņ wapac pi dau ñamlic-nga. Sêtoc lêņ dau sa gitôm lêņ ti gauc atu, ma gauc gêm bu oc ndic Pômdau tandô ñayham. Magoc mba. Lêņ dau hêganôn gêņ awê-nga ñambwa, ma oc tòm dom bu nem ñac si ñalôm kwi e sêhu lêņ ñalôm ñagalac-nga siņ.

Kilisi ti yac neņ dambo taņli ñahu

3 ¹Anötö uņ mac sa awhiņ Kilisi, ma kwahic dec iņ ndöc Anötö ndê andô-nga yêc undambê. Tu dinaņ-nga dec asa nem lêņ ti tamkwê gêņ undambê-nga eņ. ²Gauc nem gêņ nom-nga êņlêc dom. Gauc nem gêņ undambê-nga hóc gêlêc. ³Bu mac ambac ndu su awhiņ Kilisi, ma mac nem ñahu ñ andô ambo tamli awhiņ Kilisi-nga, naņ yêc siņ dau yêc Anötö-nga. ⁴Têņ ndoc mac nem tamli ñahu Kilisi dau meņ hóc asê, naņ Anötö oc tóc mac nem lêņ ambo tamli-nga asê tiawê, ma mac oc alhac awhiņ Kilisi ti ñawasi atu.

Lêņ ñalôm akwa-nga

⁵Bocdinaņ ahu mêtê sac hoņ naņ meņ akêņ ñalôm akwa, naņ siņ. Mêtê dau gitôm mac nem ñacyo daņ naņ kalhac seņ andöc tamli-nga ahuc, bocdinaņ andic iņ ndu. Mêtê kaiņ bocdec ahu hoņ siņ, mêtê mockaiņ-nga, mêtê ñadômbwi, ma mêtê sac-sac ñalôm ñagalac-nga. Ma ayob daôm bu aņkuc lau naņ sêkêņ awa ti wapa nom-nga kalhac si gauc ñamata ñapaņ, naņ dom. Bu lêņ dau gitôm ñac sem akiņ anötö gwam. ⁶Lau hoņ naņ sêsa lêņ kaiņ dinaņ, oc sêtap Anötö ndê atac ñandê sa. ⁷Muņ-nga, mac daôm akôc gauc tòm ñac lau dinaņ sêkôc, ma aņkuc ñac si mêtê sac. ⁸Magoc kwahic dec ahu mêtê sac hoņ siņ. Atac ñandê têņ lau me alic ñac sac dom, ñalôm li sa dom, ma ayob nem whamsuņ bu asôm yom sac-sac apu lau-nga ti yom mayaņ-nga dom. ⁹Ma asôm yom tasaņ têņ nem asidôwai dom. Gauc nem bu mac ahu lêņ ñalôm akwa-nga siņ su, dec akôm mêtê kaiņ dinaņ tiyham dom. ¹⁰Ma asa nem lêņ ti ñalôm wakuc. Bu Anötö, naņ kêmasaņ ñamalac bu sênem iņ aņgô sêmbo nom, naņ gêm gwelêņ pi mac mbo, tu bu mac atiwakuc, ma tu bu mac aņyalê iņ ti ndê lêņ gitêņ tidôn. ¹¹Ma yac lau naņ dasa lêņ wakuc dinaņ, naņ dahêgo dauņ tu yac neņ ñahu nom-nga tiyham dom. Yac bu lau Grik me lau Israel-nga, gai me lau aņgô batac, lau naņ taņkuc pwac sêsê ñamlic-nga me taņkuc dom, lau akiņ ñambwa me lau naņ dau sêmbo si gêņ, naņ Anötö gauc gêm lêņ hoņ

dinaŋ ŋadaŋ hóc gêléc su dom. Gêŋ tigerŋ naŋ gêŋ atu têtŋ iŋ, naŋ Kilisi piŋ yac hoŋ dônŋ dati iŋ ndê.

Lêŋ ŋalôm wakuc-ŋga

¹²Anötö tac whiŋ mac ma kêyaliŋ mac sa ati iŋ ndê lau dabuŋ. Tu dinaŋ-ŋga dec asap mêtê ŋayham bocdec dônŋ gitôm mac asóc ti nem ŋakwê. Tamwalô lau ma atac apu ŋac ti nem ŋalôm sambuc, aŋgwiniŋ daôm, asa lêŋ malô, ma akóc nem ŋalôm dônŋ. ¹³Asa naŋ ndê asidôwa kôm sac têtŋ iŋ, naŋ kóc ndê ŋalôm dônŋ bu hóc ŋawapac dau, ma suc iŋ ndê sac kwi. Asuc sac naŋ asidôwai sêkôm têtŋ mac naŋ kwi, tôm Pômdau dau suc mac nem kwi. ¹⁴Ma asap mêtê atac whiŋ-ŋga dônŋ, bu mêtê dau piŋ mêtê ŋayham-ŋayham hoŋ dônŋ sêpitigeŋ. ¹⁵Kilisi ndê yom malô nem gôliŋ mac nem ŋalôm. Bu Anötö kêgalêm mac sa bu ati gôlôwac dabuŋ tigerŋ, naŋ yom malô dau piŋ mac dônŋ. Ma anem daŋge Anötö ŋapaŋ. ¹⁶Kilisi ndê yom ŋandô nem mac nem ŋalôm ahuc sambuc, dec kêŋ gauc ŋayham têtŋ mac bu anem la ti andôhônŋ têtŋ daôm. Anem wê yêc Buku Wê-ŋga, ti wê dabuŋ ma wê ŋatô naŋ ŋalau Dabuŋ kêŋ têtŋ mac, bu ampiŋ Anötö ma anem daŋge iŋ ti nem ŋalôm sambuc. ¹⁷Gêŋ hoŋ naŋ mac akôm ti yom hoŋ naŋ asôm, naŋ akôm tu Pômdau Yisu ndê ŋaê-ŋga. Ma anem daŋge Damaŋ Anötö tu Kilisi-ŋga.

Damba ti dindai ma balêkoc si ŋagôliŋ ŋatô

¹⁸Mac lauwhê, asóc nem ŋgaci ŋapu, bu lêŋ dinaŋ gic waê lauwhê naŋ sêkêŋ whiŋ Kilisi. ¹⁹Ma mac laungac, atac whiŋ nem lauwhê ma atigasec ŋac dom. ²⁰Balêkoc, mac daŋam wambu yom hoŋ naŋ dinam ti damami sêsôm têtŋ mac. Bu lêŋ dinaŋ gic Pômdau tandô ŋayham. ²¹Mac dambai, ali nem balêkoc si ŋalôm sa dom. Ayob ŋac ŋapep tu bu ŋac lic ŋakam sa e sêtec lêŋ ŋayham lec dom.

Lau akiŋ ma ŋadaui si ŋagôliŋ

²²Mac lau akiŋ, asóc nem ŋadaui nom-ŋga si yom hoŋ ŋapu. Anem akiŋ tu bu mac nem ŋadaui sêlic mac ŋayham-ŋga ŋambwa lec dom. Mba. Mac nem ŋadaui bu sêmbo sêwhiŋ mac me sêmbo dom, magoc akôm nem gwelenŋ hoŋ ŋapep eŋ. Anem akiŋ ti nem ŋalôm sambuc, ma atóc asê bu mac atoc Pômdau sa. ²³Akôm gêŋ hoŋ ti nem ŋalôm sambuc eŋ, gitôm mac am akiŋ Pômdau, ma tôm mac am akiŋ lau nom-ŋga tawasê dom. ²⁴Mac aŋyalê su bu mac am akiŋ Kilisi mac nem Pômdau, ma iŋ oc kêŋ mac awêkaiŋ nem gêŋ lêŋsêm yêc undambê ti mac nem ŋagêyô ŋayham. ²⁵Magoc asa naŋ kôm giso, naŋ oc tap ndê ŋagêyô sa. Ma Anötö oc toc ŋamalac daŋ sa hóc gêléc daŋ dom. Iŋ oc êŋsahê yac hoŋ ŋa saê tigerŋ.

4 ¹Mac ŋadaui, aŋyalê ŋapep bu mac daôm nem ŋadau mbo undambê, ma bocdinaŋ ayob nem lau akiŋ ŋapep, ma ŋaôli bocke naŋ gic ŋac ŋawaê, naŋ akêŋ têtŋ ŋac.

Pol gêm la lau Kolosi-nga

²Anem ali ma asap mêtê dateŋ mbec-nga ti danem danŋe Anötö-nga dôŋ naŋga. ³Ma ateŋ mbec tu yac-nga whiŋ, bu Anötö léc gatam su têtŋ yac bu ahoc iŋ ndê yom asê, ma bu awê yom pi Kilisi naŋ muŋ-nga yêc siŋ dau, naŋ sa tiawê. Tu Kilisi ndê yom dinaŋ-nga dec aö gandöc gapocwalô. ⁴Ateŋ mbec bu Anötö puc aö dôŋ bu wakôm neŋ gwelenŋ ŋapep, ma wawê yom dau sa yêc awê eŋ. ⁵Asa nem lêŋ ambo lau sêkêŋ whiŋ dom-nga ŋalôm ti gauc eŋ. Ma aŋsalê lêŋ tu bu atôc Kilisi têtŋ ŋac tôm bêc hoŋ. ⁶Akôc gauc ŋapep pi yom asôm-nga bu asôm yom êmwasiŋ lau ti nem ŋac sa-nga, ma aö lau si yom ŋalêŋ ŋayham.

Pol sôm bu êŋkiŋ Tikikus lu Onesimus sêtêŋ Kolosi sêndi

⁷⁻⁸Kwahic dec aö bu waŋkiŋ yac neŋ asidôwa ma ŋgac atac whiŋ-nga Tikikus têtŋ mac loc. Iŋ kalhac naŋga ma gêm akiŋ Pômdau whiŋ aö. Aö waŋkiŋ iŋ loc bu ndic miŋ aneŋ yom, ma asidôwai gameŋ dindec-nga si yom hoŋ têtŋ mac. Ma iŋ oc nem malô mac nem ŋalôm. ⁹Ma aö waŋkiŋ Onesimus, naŋ mac nem daŋ ma yac mba asidôwa atac whiŋ-nga naŋ kêtŋ whiŋ naŋga eŋ, whiŋ Tikikus têtŋ mac loc. Iŋlu oc sêndic miŋ yom gameŋ dindec-nga hoŋ têtŋ mac.

Pol kêtŋ ndê acsalô têtŋ lau ŋatô

¹⁰A ristakus, naŋ ndöc gapocwalô whiŋ aö, naŋ kêtŋ ndê acsalô têtŋ mac, ma Banabas ndê têtŋgac Mak kôm acsalô têtŋ mac bocdinaŋ. Mak bu hôc asê mac, dec akôm tôm aö gasôm têtŋ mac muŋ su, ma akôc iŋ sa. ¹¹Ma Jisas, ŋgac naŋ sêsam iŋ ndê ŋaê daŋ bu Justus, naŋ kêtŋ ndê acsalô têtŋ mac whiŋ. ŋac lau tö dinaŋ sêmbo sêwhiŋ aö ma sem malô aneŋ ŋalôm. ŋac lau Israel-nga naŋ sêkêŋ whiŋ Kilisi, ma sem gwelenŋ sêwhiŋ aö ma yac ahoc ŋawaê pi Anötö ndê gôliŋ asê. Lau Israel-nga daêsam sêmbo sêwhiŋ aö dom, ŋac lau tö dinaŋ solop. ¹²Ma Epapras, Kilisi ndê ŋgac akiŋ, naŋ mac daôm nem daŋ, naŋ kêtŋ ndê acsalô têtŋ mac bocdinaŋ. Iŋ tôm bêc hoŋ teŋ mbec tu mac-nga bu mac alhac naŋga atôm lau gwalam akwa akêtŋ whiŋ-nga, ma asa nem lêŋ hoŋ tôm Anötö tac whiŋ. ¹³Aö wasôm yom ŋandô têtŋ mac bu iŋ yêm dau su ŋandô tu mac-nga ŋapaŋ, ma tu lau sêkêŋ whiŋ-nga naŋ sêmbo malac Laodisia ma malac Hierapolis-nga bocdinaŋ.

¹⁴Luk, dokta naŋ yac atac whiŋ, lu Demas sêkêŋ si acsalô têtŋ mac whiŋ. ¹⁵Akêtŋ yac mba acsalô têtŋ asidôwai Laodisia-nga, ma têtŋ lau sêkêŋ whiŋ-nga naŋ sêkac sa yêc Nimpa ndê andu tu sêlic om-nga, ma têtŋ Nimpa dau bocdinaŋ.

¹⁶Têtŋ ndoc sêsam bapia dindec têtŋ mac su, naŋ akêtŋ têtŋ gôlôwac dabuŋ yêc Laodisia bu ŋac sêsam whiŋ. Ma bapia naŋ aö gakêtŋ têtŋ ŋac,

naŋ sêkêŋ têtŋ mac asam bocdinaŋ. ¹⁷Asôm têtŋ Akipus bu sap sakiŋ naŋ Pômdau kêtŋ sip iŋ amba, naŋ dôŋ, ma kôm ŋapaŋ e ndic dabiŋ.

¹⁸Aneŋ ŋaê Pol dec, gato ŋa aô dauŋ amaŋ. Aô gacgeŋ gandöc gapocwalô, dec wandac mac bu gauc nem aô. Anötö ndê mwasiŋ whiŋ mac hoŋ.